

Domstolsstyrelse pillugu inatsisip allanngortinneqarnera pillugu inatsisit assigiinngitsut

Kalaallit Nunaannut atuutilersinneqarnissaat pillugit peqqussummut missingiutip

Kalaallit Nunaanni Namminersorlutik Oqartussanit akuersissutigineqarnissaa pillugu

Inatsisartut aalajangiiffigisassaattut siunnersuut

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut

Naligiissitaanermullu Naalakkersuisumit saqqummiunneqartoq

pillugu

Inatsisinut Ataatsimiititaliap

siunnersuutip aappassaaneerineqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq

Inatsisartunut ilaasortaq Kuno Fencker, Naleraq, siulittaasup tullia

Inatsisartunut ilaasortaq Pipaluk Olsen, Demokraatit

Inatsisartunut ilaasortaq Iddimanngiiu Bianco, Inuit Ataqatigiit

Inatsisartunut ilaasortaq Anders Olsen, Siumut

UKA2025-mi ulloq 7. oktober 2025 siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaanni aalajangiinerit eqqartuussutitut katersivimmi tamanut ammasumi Domstolsstyrelsimillu ingerlanneqartumi ilaatinneqalernissaannut inatsisitigut tunngavissalernissaq siunnersuummi pingaarnertut anguniarneqarpoq. Eqqartuussutitut katersivik tamanut ammasoq Danmarkimi inatsisikkut nr. 1867-ikkut, 29. december 2015-imeersukkut atuutsinneqalerpoq.

§ 9 a-mik nutaamik ilanngussinissaq siunnersuummi siunnersuutigineqarpoq, tamatuma nassatarisaanik aalajangiinerit Kalaallit Nunaanni eqqartuussivinnit eqqartuussutigineqartut siunissami eqqartuussutitut katersivimmi digitaliusumi tamanut saqqummiunneqarsinnaalissallutik. Aalajangiinerit eqqartuussutitut katersivimmut ilanngunneqarneranni paasissutissat kinaassutsimut tunngasut isertuunneqassapput.

Siunnersuutip Inatsisartunit siullermeerneqarnera

Siunnersuut siullermeerneqarami taparserluarneqarpoq.

Pingaartumilli apeqqutit marluk oqallinnermi erseqqissaatigineqarput.

Apeqqut siullesq Kalaallit Nunaani aalajangiinerni kinaassutsip isertuunneqarnissaanut tunngavoq, tassa naak kinaassutsimik isertuussisoqaraluartoq, pingaartumik inoqarfinni mikinerni inuit pineqartut aalajangersimasut ilisarineqarsinnaanerit ernummatigineqarmat. Innuttaasut taakku illersorneqarnissaasa pingaaruteqarnera tamatumani erseqqissaatigineqarpoq aammalu siunnersuutip nunatsinni pissutsinut sapinngisamik pitsaanerpaamik naapertuuttunngorlugu naleqqussarneqarsinnaanera kissaatigineqarluni.

Apeqqutip aappaa tassaavoq Domstolsstyrelsimut siulersuisuni kalaallinik ilaasortaqaannginnera, tamatumani aqutsisoqarfiup Kalaallit Nunaanni aamma ingerlatallip Kalaallit Nunaannut sinnisussamik siulersuisuni soorunami ilaasortaqaarnissaa kissaatigineqarluni.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuutip piviusunngortinneqarnerani aningaasaqarnikkut kingunerisassat siunnersuutikkut nalunaarneqartut ataatsimiititaliamit maluginiarneqarpoq, taamaalillunilu eqqartuussivinnut 2024-2027-mut isumaqatigiissut ukiunut arlalinnut

atuuttussaq aqqutigalugu siunertamut aningaasanik immikkoortitsisoqarsimalluni, tamatumalu saniatigut siunnersuut qallunaat akisussaaffeqarfiata ataaniippoq.

Ataatsimiititaliap siunnersuummut oqaaseqaatai

Ataatsimiititaliamit aallarniutigalugu oqaatigineqassaaq eqqartuussutitut katersiviup tamanit, tassungalu ilanngullugu innuttaasunit, inuussutissarsiortunit pisortallu oqartussaasuinit iserfigineqarsinnaanera ataatsimiititaliamit pitsaasutut isigineqarmat.

Aalajangiinerit kinaassutsimik isertuussivigineqarnissaannut tunngatillugu ataatsimiititaliamit pingaartinneqarpoq kinaassutsimik isertuussisussanngortitsinermi inoqarfiit mikisut amerlasuujullutik nunatsinni pissutsit immikkuullarissuunerat sapinngisamik annertunerpaamik isiginiarneqassasoq.

Ataatsimiititaliamit aamma oqaatigineqassaaq eqqartuussutitut katersivik naluneqanngitsutut inuit pillugit paasissutissanut inatsimmut, ingerlatsineq pillugu inatsimmut aammalu nipangiussisimasussaataaneq pillugu pillaasarnermut inatsimmi malittarisassanut killiliussat iluini pilersinneqarsimammat taakkunani tunngavissaatinneqartut Kalaallit Nunaanni eqqartuussivinni aalajangiinerit tamanut saqqummiunneqarneranni aamma atuutissapput.

Ataatsimiititaliap inassuteqaatai

- Siunnersuut akuerineqassasoq ataatsimiititaliamit isumaqatigiittumit inassutigineqarpoq.
- Kiisalu ataatsimiititaliaq Naalakkersuisunut kaammattuummik imaattumik saqqummiussivoq: ”Siunnersuutip matuma piviusunngortinneqarnissaani innuttaasut pisinnaatitaaffiisa illersorneqarnissaat kinaassusiisalu isertuunneqarnissaat qulakkeeqqullugit ataatsimiititaliap Naalakkersuisunut matumuuna kaammattuutigerusuppaa, pingaartumik innuttaasut inoqarfinni mikinerusuni najugaqartut eqqarsaatigalugit. Taamatuttaaq Kalaallit Nunaanni eqqartuussiviit Domstolsstyrelsep siulersuisuini siunissami ilaasortaqaalernissaat sulissutigeqqullugu Naalakkersuisut kaammattorneqarput.”

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimanngiiu Bianco

Anders Olsen